

REGIONAL NEWS BULLETIN

Date – 25/09/2024

Time - 7:30 -7:40Hrs

HEADLINES

1. Kolasib District Land Owner's Association chuan ram neitu nihna chingfel tura sawrkar phut nan tukin dar 6 atang khan Silchar leh Aizawl inkar kawngpui an dang.
2. Kawlphetha renchem leh awmze nei zawka hman tangkai a nih theih nana hmalakna 'Demand Side Management Project' chu nimin khan P&E Minister Pu F. Rodinglian a hawng.
3. Tripura-a helpawl pahnih National Liberation Front of Tripura (NLFT) leh All Tripura Tiger Force (ATTF) zanga chuang te chuan nimin khan an ralthuam tungin nunphung pangngai zawm turin sawrkar kutah an inpe.
4. Jammu and Kashmir Assembly inthlan thawhnhnihna atan tukin atang khan vote thlak a ni.



KOLASIB LAND OWNERS PROTEST

Kolasib District Land Owner's Association chuan ram neitu nihna chingfel tura sawrkar phut nan tukin dar 6 atang khan NH 06 NH 306 Silchar leh Aizawl inkar kawngpui an dang.

Kolasib District Land Owner's Association thuchhuaha an tarlan dan chuan kum 3 chuang hma la thei lova an ram khuahkhirhna chu sut thuai se an duh a. Ram neitu nihna chingfel thuai tura sawrkar phûtin RRF Notification 1965 chu ram hmasawwna daltu a ni tiin thiah ni se, an ti a. Four Lane Project

pawh tihlawhtling tura phûtin, he'ng an thil phut hrang hrang te hian ngaih pawimawh a hlawh theih nan Silchar leh Aizawl inkar kawng chu dan ni se, tih an rel a ni.

An thuchhuah tarlan dan chuan tun hma atanga an lo in benbelna thin chu tunhnaia Four Lane kal tur avangin Forest Department chuan CA/NPV Compensation an duh avangin RRF Notification 1965 tlawhchhanin Vairengte leh Sairang inkar chu Roadside Reserve Forest tiin ram an rawn chuh buai thar leh, an ti a. Vairengte leh Sairang inkara cheng mipuite chu he dan avang hian an him lo tih sawiin mahni in, huan lo/ram tia an lo cheibawl chu Forest Dept.-in an chhuhsak niin an sawi a. RRF dinchantir tuma hmalakna awm mek chu tha ti lovin an dodal zel dawn tih an sawi a ni.

Ram neitu intelkhawm chuan kum 2020 atangin Four Lane ram lak tur avangin sawrkarin an ram chu khawih theih lohin an khuahkhirhsak an ti bawk a. Chhungkaw tam takin eizawn nana an hman an huan thlai enkawl zui thei lovin an dikna leh chanvo rahbehsak an ni, an ti a. An dikna leh chanvo nawr chhuak tura Road Block hial a lo ngai ta chu pawl an tih thu sawiin Mizoram mipuite hriatthiamna an ngen tih an sawi bawk.

(CORR)



SERCHHIP POSHAN ABHIYAN

September thla chhunga Poshan Maah hmanna kal zelah Serchhip ICDS Project buatsaihin CDPO Conference Hall, P&E Veng, Serchhipah Fruit Festival cum Sale nimin khan neih a ni a. Social Welfare Dept Joint Secretary Pi Zonuntharin a hmanpui.

Pi Zonunthari chuan naupangten chaw tha kham khawp eia nun bul an tan theih nan zirtirna tha inpe a; thisen tlakchhamna laka nu naupai, nau pawm leh tleirawl te venna tur leh, eitur hrisel ei kawnga mitinin hma kan sawn zel theih na turin POSHAN Maah hi hman a ni, a ti. Nutrition tha avangin naupangin natna an do theihna a lo pung a, an thangduang a, lehkhazirna kawngah pawh hma an sawn chak, a ti a; naupang kum 6 hnuailamin in lama an ei bak Anganwadi-a ei tur tha an ei thin te hi hriselna atan a tha em em a, Central Sawrkar bultumin nutrition tha a thlawna an dawng thei zel hi an vannei hle a ni, a ti. Eitur tha hi thil manto tak a ni kher lo a, Mizoten an tharchhuah thlai hring te

leh thei te, ban phak maia awm chuktuah huana tharchhuah te a hrisel em em a ni tih hria a, ei tur tha ei kawngah hmasawn tum theuh turin kalkhawm te a sawm a. Poshan Maah chu Department pakhat hmalakna avanga hlawhtling thei a ni lo va, line department hrang hrang te nena thawhhona leh mipui te tawiawmna avang chauha hlawhtling thei a ni tiin thawhhona tha nei zel turin khullian chuan a sawm a. Fruit Festival hlawhtling taka buatsaih a ni chu lawmawm a tih thu sawiin, chin chhonzawm zel tlak nia a hriat thu a sawi bawk a ni.

Eitur tha ei inzirtina Poshan Maah hi September ni 1 atangin Serchhipah hman tan a ni a. A kar khatnaah Infant and Young Child Feeding inzirtirna hun hman a ni a; a kar hnihnaah anemia test neiin Health Department nena tanghoin naupang 700 bawr vel test an ni a; a kar thumnaah Indigenous Sports neiin Serchhip Field Veng YMA Chhang te nen hun an hmang a; a kar tawp berah hian Fruit Festival buatsaih a ni ta a ni.

Ni khat awn Fruit Festival cum Sale-ah hian thei chi hrang hrang leh thei atanga siam chhuah jam, juice, squash leh chhang chi hrang hrang te lei tur a awm a. Zotui Orange Producer Company te, Lellen Amla Processing te, S& R Food te, Darei Banana Food Processing Industry te, Kimkim Food Processing Industry te an tel a ni.



POWER MINISTER

Kawlphetha renchem leh awmze nei zawka hman tangkai a nih theih nana hmalakna 'Demand Side Management Project' chu nimin khan Aijal Club ah P&E Minister Pu F. Rodinglian a hawng a

He hunah hian Pu F. Rodingliana chuan kum 10 chhunga state mipui ten power an mamawh zat a let deuh thawa a pun thu sawiin, kum 2015 a mamawh san lai berin 97 MW vel a nih lain tunah chuan 163 MW chuang a ni ta a ti a, hetihlai hian state power siamchhuahte a pun si loh avangin ram pawn atangin man to tak takinchawkluh a ngai a, chuvangin renchem taka power hman a tul a ni a ti a, unit khat hum hian unit khat dang power thar chhuak tluk a ni, a ti a. Mizoram Sorkar-in power-a intodelh turin nasa taka hma a lak mek thu sawiin, Central lamah bawhzui ngaite bawhzui zel a ni a, reiloteah project tha tak tak bul tan a nih thuai theih a beisei thu a sawi a ni.

Power Minister chuan kalkhawmte hmaah AT&C loss avanga energy hloh tam lutuk tih tlem a tul zia sawiin, thawktute

chu hemi kawngah tan la tura fuihin, thahnem ngai taka mahni hna theuh thawk turin leh kan hnate chu eizawna mai anga ngai lova, rawngbawlina leh ram leh khawtlang tana thawk kan ni tih inhre renga, tha thlah lova hna thawk thin turin a chah bawk a ni.

He Project hi Bureau of Energy Efficiency (BEE), Ministry of Power, Govt. of India kaltlanga Mizoram DISCOM - Power & Electricity Department leh Green Tree Global Pvt. Ltd. te hmalakna tur a ni a, kum 2 chhunga power mamawh zaa 10 tala tih hniam tum a ni. Khawvel ram hrang hrangin an ngaih pawimawh em em Paris Agreement-a India a tel ve avangin energy renchem tura hmalakna hian ngaih pawimawh a hlawh em em a ni.

<><><>

SPORTS MINISTER

National Service Scheme (NSS) din champha vawi 55-na chu nimin khan Sports & Youth Services Minister Pu Lalnghinglova Hmar hovin Aizawl-ah hman a ni.

Sports Minister chuan NSS thupui, keimah ni lovin nangmah tih chu a Pathian thu hle a a hriat thu sawiin, NSS volunteer te thisen pe tam ber an ni chu a ropui a tih thu leh midangte tan malsawmna ni zel turin a chah a, NSS te hmalakna, adopted village-ah danglamna a thleng em tih chu chona-ah ngai a, tan la zel turin a chah a ni.

Pu F. Sangvuana, State NSS Officer cum Deputy Secretary, NSS Cell, Mizoram tarlan danin, Mizoramah NSS volunteer 30100 an awm mek a, zirna in, college 29 leh Higher Secondary School 72-ah NSS unit 301 din a ni tawh a, kum 2023- 2024 chhungin thisen unit 4900 an pe a, thisen pek tam lamah pakhatna dinmun an hauh mek a, NSS te hian vantlang tui lakna public water point, Vantlang Inthiarna, luikawr leh Vantlang in te tihfai leh siam hnatlang vawi 50 vel an nei tawh tih a sawi bawk.

<><><>

KOLASIB SWACHHATA HI SEVA

Kolasib UD&PA department bul tum in Swachhata Hi Seva hmalakna kal zelah Cleaning of Black Spot Day -bawlhhlawh then fai ngai loh thenfai ni nimin khan hman a ni a, St. John's HSS leh Missionaries of Charity Home inkara bawlhhlawh awm te thenfai ani.

Bawlhhlawh thenfai hnatlang neih hma inkhawm tawi ah Kolasib DUDO Pi Josephine Zonunsangi chuan thu sawiin, faina chu mihring nun a thil pawimawh tak a ni, tiin, faina tel lo chuan lehkha zir sang hle mah ila thiamna khingbai nei ang chauh a ni, a ti a. Faina pual hnatlanga tel zirlai naupangte chu faina pawimawh zia hria a, midangte zirtir chhawngtu ni zel turin a chah a ni.

He hunah hian Kolasib Catholic Kohran bialtu puithiam Father Andrew Biakfela leh Kolasib Sub-Hqrs YMA President Pu Thomas D. Lalengliana te pawhin faina pawimawh zia sawiin, a lang chauh fai lovin, a langlo thlenga faina ngai pawimawh tur leh faina lamah sorkar hmalakna dah pawimawh turin zirlai leh zirtirtu kalkhawmte an chah bawk.

Kolasib Venglai VCP Pu HP Lalfamkima'n lawmthu a sawi zawhah St Johns HSS leh St Maria Gorettis School a zirlaiten kawng sir leh kawng dunga bawlhhlawh awmte an thian a ni.

(Andrew Kolasib PTC)

<><><>

MNF PRESS CONFERENCE

MNF General Secretary, Pu K. Sawmvela chuan, kawng chhiat nasat em em chhan chu thal chhunga enkawla siamthat ngai siam loh vang liau liau a ni, a ti.

MNF Media & Publicity ten nimina Aizawl Press Club-a thuthar lakhawmtute an kawmna ah, MNF Gen Secy leh PWD Engineer in Chief hlui ni bawk Pu K. Sawmvela chuan Kawnpui leh Khamrang inkar kawng chhiat chungchangah, Chief Minister in eptu lam an nih laiin ZPM a sorkar ruala kawng chhia tihbo an tum thu a sawi chu, thla 9 an sorkar hnu ah kawng chhia chu a tibo ta em tih chu mipuite chhan tur nise a ti a, November-April chhung hian kum dangah chuan sum awm ang angin PWD hian khawpui leh kawng dang pawh an repair thin a ni a. Kumin hi chuan sum neih loh vang nge hmun hrang hrangah repair hmuh tur a tlem hle a, kumin hian thal laia a hun taka repair chu nise tun ang hun hi chu pumpelh theih ngei tur a ni, a ti.

Silchar kawng pawh State mawhphurhna a ni lo, NHIDCL mawhphurhna a ni ti mai lovin, kawng a chhiat miao chuan a tuartu mipui an nih avangin a tawpa mawhphurhna latu chu State Sawrkar neitu a ni tih pawm a, nakin zelah pawh mawhphurhna

la ngamlo ang ziazanga midang puhmawh tur zawng zawng lova a hun taka tan la turin Sawrkar a ngen tih a sawi a ni.

<><><>

TRIPURA

Tripura-a helpawl pahnih National Liberation Front of Tripura (NLFT) leh All Tripura Tiger Force (ATTF) zanga chuang te chuan nimin khan an ralthuam tungin nunphung pangngai zawm turin sawrkar kutah an inpe. Nimin khan Sepahijala district-a Jampuijala-ah helho hian an ralthuam an tung a. He hunah hian Chief Minister Dr.Maik Saha, State Chief Secretary JK Sinha, Director General Of Police Amitabh Ranjan, leh official dangte an tel a ni.

<><><>

J&K ELECTION

Jammu and Kashmir Assembly inthlan thawhnhnihna atan tukin atang khan vote thlak a ni. Inthlan thawhnhnihnaah hian Assembly bial 26 ah inthlan tur niin polling station sang thum leh 502 siam a ni a. Heng zingah hian khawpuiah 1056 leh thingtlangah 2446 a tel. Inthlan buaipui tur hian mi sing 1 leh sang 3 chuang ruat an ni bawk.

Boruak ralmuang tak hnuaiah inthlan anih theih nan venhimna pawh khauh taka kalpui a ni a. Polling station zawng zawngah hian webcasting khawl dah vek a ni bawk. Puan tawh angin Jammu & Kashmir ah hian Assembly inthlan hi thawhthuma neih tur a ni a. Thawh khatna hi tun thla ni 18 khan neih a ni tawh a. Vawiinah thawh hnihna zawh fel a ni ang a, thawh thumnaah hian Assembly seat 40 ah October ni 1 ah vote thlak a ni ang. Inthlana vote tla te hi OCTober ni 8 ah chhiar tura ruahman a ni.

<><><>

ISRAEL-LEBANON

Israel sipaiten Lebanon-a Hezbollah te inkulhna a beih avanga thi zat chu mi 558 an tling tawh. Lebanese Health Ministry sawidanin Israel sipaite chetna avang hian hliam tuar mi 1835 an awm tawh a. Hetihlai hian Hezbollah lam hian Israel hi an chhanglet ve nghal a. Israel sipaite inkulhna Elyakim military base, Haida chhim lam ami chu an kah thu an sawi a ni.

Khawvel ram hruaitute leh UN chuan tuna inbeihna thleng mek chu ti tawp turin a ngen a. White House thuchhuah danin US chuan Gaza-a inkahhai thlen tir tur leh Hamas te nen an mi hren te chhuah tura inremna siampui a tum thu a sawi a. Hei bakah hian Israel leh Lebanon ramria boruak sosang tak pawh ti dai tura hmalak a tum thu a sawi a ni.

UN General Secretary Antonio Guterres chuian Israel leh Lebanon inkar boruak chu ngaihven a tul hle tih sawiin civil mite thihna a thlen nasa hle a ti a. Heng zingah hian naupang leh hmeichhia tam tak an tel thu a sawi a ni.

<><><>

PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmang leh dawn a. Mizo tawnga lehlinin a zui ang. Tun tum ami hi episode 114-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestream a ni ang.

<><><>